

სულ რაღაც 4 წამი...

დონეცკი. “მახტიორის” სტადიონი. 18 აპრილი.

“მახტიორი” (დონეცკი) – “დინამო” (თბილისი) – 1:1 (0:0).

“მახტიორი”: დეგტიარიოვი, პოლაკი, პოპოვი, დროზდენკო, პიანიხი, გრიგორიევი, პოლიპჩუკი, ბოლდიუკი, ჟუკოვი (დუდინსკი), ევსენკო, კოზინკევიჩი (იარემჩენკო).

“დინამო”: კოტრიკაძე, მოძუაშვილი, ჭელიძე, ხურცილავა, ხინჩიკაშვილი, პეტრიაშვილი, კუტივაძე, ასათიანი, მეტრეველი, გ. ნოდია, ლ. ნოდია.

მსაჯი: ვ. ლიპატოვი (მოსკოვი).

დუბლიორები – 5:0 “მახტიორის” სასარგებლოდ. ბურთები გაიტანეს ორლოვმა (2), ზახაროვმა (2), გრუბჩაკმა.

თბილისის “დინამოს” ტრადიციულად არ გამოხდის თამაში დონეცკში. ასე იყო უწინ, ასეა ახლაც. ვინ იცის, რამდენჯერ წაუფორხილებიათ თბილისელებს დონეცკში, როცა საუკეთესო სატურნირო მდგომარეობა ჰქონდათ. განვლილ შეხვედრაში საქმეს ისიც ართულებდა, რომ მეშახტეთა ქალაქში 18 აპრილს გადაუღებლად წვიმდა და ატალახებული მიწის უპირველესად დინამოელებს უშლიდა ხელს, რომლებიც მასპინძლებზე უფრო ტექნიკურად და სწრაფად თამაშობენ.

ინიციატივა თავიდანვე დინამოელებმა აიღეს ხელთ. ბურთის გატანის შესაძლებლობა მიეცათ გ. და ლ. ნოდებს. შორიდან რამდენიმეჯერ დაარტყეს კუტივაძემ და პეტრიაშვილმა, მაგრამ ბურთი მიზანს სცდებოდა. “მახტიორი” უმთავრესად კონტრიერიშებზე აგებდა თამაშს, სადაც განსაკუთრებით გამოირჩეოდა პოლიპჩუკი.

მაღალ ტემპში მიმდინარეობდა მეორე ტაიმიც. 52-ე წუთზე ასათიანმა კარგი კომბინაცია გაითამაშა ლ. ნოდისთან, ამ უკანასკნელმა ცენტრში მიაწოდა თავის ძმას და ჩემპიონატის საუკეთესო ბომბარდირმა თავური დარტყმით ანგარიში გახსნა – 1:0.

ამ წარმატებას კიდევ რამდენიმე სახიფათო მომენტი მოჰყვა, მაგრამ დონეცკელებმა შეძლეს მათი მოგერიება და შემდეგ ინიციატივამაც მათ მხარეს გადაინაცვლა. აქ თავი გამოიჩინა დინამოელთა მეკარე ს. კოტრიკაძემ. იგი სულ ახლახან საზეიმოდ გაცილეს, მაგრამ ვინაიდან ურუშაძე ერთ-ერთ ვარჯიშზე საკმაოდ სერიოზულად დაშავდა, მისი შემცვლელი არ აღმოჩნდა და მწვრთნელებმა მეკარის საპასუხისმგებლო პოსტი ისევ კოტრიკაძეს მიანდეს და, უნდა ითქვას, რომ ვეტერანმა იმედი გაამართლა.

მატჩის დასასრულს უახლოვდებოდა და მასპინძლები სულ უფრო აძლიერებდნენ იერიშებს. 82-ე წუთზე ხინჩიკაშვილი თავის საჯარიმო მოედანზე შეცდა, რის შედეგადაც კართან ახლოს უმეტეაღყუროდ დარჩა პილიპჩუკი. მან ზუსტად გამოიყენა მომენტი – 1:1.

ორიოდე წუთის შემდეგ დეგტიარიოვმა მოიგერია ძნელი ბურთი, კიდევ ცოტა ხანი და კუტივაძემ დაკარგა გოლის გატანის საუკეთესო შანსი.

დინამოელთა ერთ-ერთი იერიშისას ლ. ნოდამ მეტოქეს ბურთი წაართვა და კარში გაგზავნა. ვ. ლიპატოვმა არ ჩათვალა გოლი და როცა თბილისელებმა მას საამისო განმარტება მოსთხოვეს, მსაჯმა მათ აჩვენა თავისი წამმზომი, რომელზეც 90 წუთს 4 წამი იყო გადაცილებული...

ნ. ჩხატარაშვილი, სსრ კავშირის დამსახურებული მწვრთნელი.

(ჩვენი სპეც. კორ.).

“ლელო”, 21 აპრილი, 1970 წ.